

von Wulf Wager

Mi haut's von de Socka




Leutla, i ben koi neidiger Mensch. Ganz gwieß net. I gönn jedem, was er verdient. In jeder Hinsicht. Wer schafft, soll sich au ebbes leischta kenna. Aber 's geit a paar dekatente Sacha, ibr dia kennt i mi scho jessasmäßig aufrega. Zom Beispiel, wenn so a Neureicher auf em Volksfescht en dr Dirndl-ond-Lederhosa-Lounge a 5-Literflasch Schampanjer komma lässt, se mit großem Brim-

borium mit em Schwert köpft, oimol en dr Ronde eischenkt, dia reschtliche vier Liter wieder zrück ganga lässt ond glei die näggschd Flasch bschdellt. Wohlgermerkt jede Flasch zu 1.500,- Euro. Ha denne ghert dr Dibbl bohrt!

No ärger han i mi aufregt, wo i letscht Woch' a A'zeig en boide graoße Stuegerter Zeitonga glesa han, wo Hapag-Lloyd a exklusive 18-tägige Reise mit em Privatjet en d' Mongolei ond zur Seidastroß für sage ond schreibe 45.990,- Euro pro Person ausgeschriebe hot. Ja Leutla, goht's no? Soviel verdienat viele s' ganz Johr net. Wenn do a Päärle mitfliagt, koscht des amol schlappe Hunderttausend Euro. Was moinat 'r, wenn dia Millionärsweiber mit ihre auf'pritzte Lippa, ihre Silikonbrüscht ond ihr solariumvrbrennte Schruppeldekolletes 's erschte Mol den Fliegr verlassat ond dene Mongola gegenüber trittat, wia dia auf oimol vrschreckt 's Weite von dr Mongolei suchat! Wahrscheinlich budlat se da Dschingis Khan nomol aus, damit der dia weschtliche Dekatenzvertreter wieder auf am schnellschta Weg zom Teufl jagt. Be i froh, dass i koi Millionär ben, dass mei Frau au ohne Professor Mang a schee's Weib ischt, ond dass mir' s em Ländle am beschta gfallt!

Bis näggschdmol


Wulf Wager

Alle Kolumna zom Nochlesa onder: www.woascht.de oder em facebook em Wulf Wager Fanclub